



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Período : Maiu 2009

Edisaun : Maiu 2009

Tomada de Posse Segundo Período ba Atór Judisiario: Passu Positivu ba Dezemvolvimentu Sistema Judisiario Timor Leste

Tomada de Posse ba segundu período ba atór judisiario (Juizes no Defensores Publico) ne'ebe hala'o iha loron 18 de Maiu 2009 iha oras 15:00 iha Tribunal de Recurso, Caicoli, Dili husi Prezidente Tribunal de Recurso no assiste husi lideransa massimu husi estado ne'ebe hanesan Prezidente da Republica Demokratica de Timor Leste Dr Jose Manuel Ramos Horta, Primeiro Ministro Timor Leste Jose Alexandre Gusmão, nomos convidados husi corpos diplomaticos no husi sosiedade sivil sira, familia nomos husi estudante faculdade de direito husi univesidade iha Dili. Tomada de Posse ne'e hanesa passu possitivu ba dezemvolvimentu sistema judisiario Timor Leste ninian.

Juizes no Defensores Publico sira ne'ebe mak simu tomada de posse ne'e hamutuk ema na'in neen ne'ebe kompostu husi Juizes na'in rua mak hanesan João Ribeiro no Afonso Carmona, no Defensores Publico na'in haat ne'ebe mak hanesan Sergio Dias Quintas, Rui Manuel Guterres, Marçal Mascarenhas, no Laura Valente Lay. Antes fo tomada de posse ba ema na'in neen ne'e uluk nana'in Prezidente Tribunal da Recurso fo tomada da posse ba Defensor Publico Geral Sergio de Jesus Fernandes da Costa Hornai hodi lidera defensores publico tomak iha Timor Leste

Sergio Dias Quintas nu'udar parte ida husi Defensores Publico ne'ebe simu posse iha ninia intervensaun dehan katak antes sira simu posse sira sente dezanima loos tanba to'o ona nia tempu atu simu posse bazeia ba procedural legal hanesan regula ona iha lei konaba prosesu treinamentu judicial ne'e. Maibe prosesu simu posse sira nia la la'o tuir espirtu lei no regulamentu konaba treinamentu judicial ninian. Maybe nune'e mos sira nafatin iha komitmentu atu kontinua ezerse e no fim sira simu posse nu'udar defensores publico, mos husu ba colegas tomak ne'ebe foin simu posse atu la bele kontente demais ho tomada de posse ne'e. Maibe nia realsa katak tomada de posse ne'e hanesan deit passu primeiro hodi la'o ba futuro ne'ebe mak sei naruk, ba iha responsabilidade foun nu'udar atór judisiario foun. Nia mos aviza ba ninia colegas tomak atu sente orgullu se wainhira sosiedade bele simu benefisiu ruma husi servisu professional sira nian ne'ebe sei fo justisa ba ema hotu iha nasaun ne'e nia laran. Nia mos husu ba nia colegas tomak atu matan moris neon na'in nafatin no pronto nafatin ba servisu iha fatin ne'ebe deit tantu iha Tribunal Distrital Suai, Oe-Cusse, Baucau nomos Dili.

Timor Leste nu'udar estado de direito no demokratiku ne'ebe foin hetan restaurasaun independensia iha loron 20 de Maiu 2002 loos duni sei presiza atór judisiario ne'ebe barak no iha kapasidade nomos karismatiku hodi implementa justisa tanba Timor Leste sei fraku no karik mos sei vulneravel ba injustisa, hanesan Sergio Hornai Defensor Publico Geral dehan iha ninia intervensaun ba audientes sira ne'ebe marka prezensa depois de simu posse.

JSMP apoiu katak Timor Leste hasoru dezafia seriu konaba atór judisiario ne'ebe mak minimu hodi bele dezenvolve estadu de direito no demokratiku, no parese ke sei hasoru nafatin obstakulu ne'ebe boot wainhira la tau matan ka hare ba sa mak sei halo ba iha setor judisiario ninian.

JSMP hato'o parabens ba atór judisiario ne'ebe mak foin simu posse, espera katak sei ho tomada de posse ne'e sistema judisiario produktiva liu tan no efetivu liu hodi fornese sistema judisiario ne'ebe diak ba sosiedade ne'ebe presiza justisa ba sira nia kazu ka problema ne'ebe sira infrenta. JSMP mos espera katak atór judisiario ne'ebe mak foin simu posse ne'e atu mantem nafatin ba valores demokrasia no estadu de direito no ho nia prinsipiu tomak ne'ebe iha, inklui pronto atu servisu iha ne'ebe deit. Ho deit aproximasaun ida nune'e no ninia prosesu ida nune'e mak lei ne'ebe ita hatane bele sai moris liu tan, besik no sai amigavel ba sosiedade no povu tomak. Tanba tuir loloos ka ideal liu justisa ne'e sai hanesan propriedade ida idak ninian no besik ba iha sosiedade.

Dala ida tan JSMP apresia teb-tebes ho tomada de posse ba atór judisiario iha segundu periodu ne'e tanba nu'udar passu positive ba dezenvolvimentu sistema judisiario Timor Leste ne'ebe legalmente iha ona atór judisiario hamutuk ema na'in 37 ne'ebe kompostu husi Juizes Nasional ema na'in 13, Prokurador Nasional hamutuk ema na'in 13, Defensor Publiku Nasional hamutuk ema na'in 11.

Atu hetan informasaun kle'an liu favor kontaktu:

Luis de Oliveira Sampaio

Diretor Ezekutivu JSMP

Diresaun E-mail: luis@jsmp.minihub.org

Landline:3323883